

UDHËZIM
Nr. 2, datë 8.3.2012

PËR KRITERET DHE PROCEDURAT E SHPËRNDARJES SË FONDIT TË MBROJTJES
SOCIALE PËR VITIN 2012

Në mbështetje të pikës 4 të nenit 102 të Kushtetutës, në zbatim të ligjit nr. 9936, datë 26.6.2008 “Për menaxhimin e sistemit buxhetor në Republikën e Shqipërisë”, ligjit nr. 9355, datë 10.3.2005 “Për ndihmën dhe shërbimet shoqërore”(të ndryshuar), ligjit nr. 10 487, datë 5.12.2011 “Për buxhetin e vitit 2012”, si dhe pikës 19/”c”, “d” të udhëzimit të Ministrit të Financave nr. 2/1, datë 15.2.2011 “Për zbatimin e buxhetit të vitit 2012”,

UDHËZOJ:

1. Ministria e Punës, Çështjeve Sociale dhe Shanseve të Barabarta, për vitin 2012, fondet e akorduara në programin “Mbrojtja sociale”, si transfertë e kushtëzuar, i shpërndan në mënyrë periodike, për:

- a) pagesën e dëmshpërblimit e të dënuarve politikë, e cila do të shpërndahet me paraqitjen nga Ministri i Financave të autorizimit për transferimin e “Fondit për dëmshpërblimin e të dënuarve politikë”.
- b) Pagesën për programin e ndihmës ekonomike.
- c) Pagesën për programin e personave me aftësi të kufizuar.
- d) Financimin e bashkive për funksionimin dhe mirëmbajtjen e ambienteve të qendrave të përkujdesit shoqëror të transferuara në njësitë e qeverisjes vendore që u shërbejnë individëve, me qëllim sigurimin dhe ofrimin e standardeve. Financimi bëhet me paraqitjen e projekteve dhe nivelin e financimit nga ana e njësive të qeverisjes vendore.

2. Për vlerësimin e projekteve të paraqitura dhe nivelin e financimit nga ana e njësive të qeverisjes vendore, në Ministrinë e Punës, Çështjeve Sociale dhe Shanseve të Barabarta, krijohet një komision me 8 anëtarë. Komisioni kryesohet nga Ministri dhe anëtarët janë: Sekretari i Përgjithshëm, Drejtori i Kabinetit të Ministrit, Drejtori i Përgjithshëm i Politikave, Drejtori i Përgjithshëm i Shërbimeve Mbështetëse (si nëpunës zbatues), Drejtori i Drejtorisë së Politikave të Shërbimeve Sociale, Drejtor i Drejtorisë së Planifikimit të Buxhetit, Analizës dhe Statistikës dhe një përfaqësues i Drejtorisë së Shërbimeve Juridike.

3. Komisioni mblidhet periodikisht dhe vlerëson projektet e paraqitura që vijnë nga ana e njësive të qeverisjes vendore, dhe vendos nivelin e financimit.

4. Njësitë e qeverisjes vendore paraqesin projektet dhe nivelin e financimit për financimin nga fondet e mbrojtjes sociale, sipas gurmës “d” të pikës 1, pranë Drejtorisë së Përgjithshme të Shërbimit Social.

5. Këshillat e njësive të qeverisjes vendore të përcaktojnë kontributin e tyre sipas mundësive financiare.

6 Njësitë e qeverisjes vendore, për mbështetje financiare sipas gurmës “d” të pikës 1 paraqesin një informacion mbi gjendjen aktuale të ambienteve të qendrave të përkujdesit shoqëror të transferuara në këto njësi, për të cilën kanë paraqitur projekt.

7. Drejtoria e Përgjithshme e Shërbimit Social Shtetëror bën vlerësimin e dokumentacionit dhe kërkesave të paraqitura nga njësia e qeverisjes vendore sipas pikës 4 të këtij udhëzimi, vlerëson prioritetin e projektit, si dhe nivelin e financimit. Vlerësimi të bëhet pas verifikimit mbi gjendjen aktuale të ambienteve të qendrave të përkujdesit shoqëror.

8. Nëse projekti dhe kërkesa e paraqitur nga njësia e qeverisjes vendore është i plotë, Drejtoria e Përgjithshme e Shërbimit Social Shtetëror bën vlerësimin e nivelit të financimit dhe të gjendjes aktuale të ambienteve me qëllim sigurimin dhe ofrimin e standardeve në qendrat e përkujdesit shoqëror.

9. Drejtoria e Përgjithshme e Shërbimit Social Shtetëror, vlerësimin e bërë me shkrim sipas pikës

6 dhe 7 të këtij udhëzimi, së bashku me projektin dhe kërkesën e paraqitur nga njësitë e qeverisjes vendore për financimin e mirëmbajtjes së ambienteve të qendrave të përkujdesit shoqëror, i përcjell në MPÇSSHB.

10. Drejtoria e Politikave të Shërbimeve Sociale, dosjen e dërguar nga Drejtoria e Përgjithshme e Shërbimit Social Shtetëror, sipas pikës 4 dhe 7 të këtij udhëzimi e verifikon plotësimin e saj dhe e përcjell në komisionin e ngritur sipas pikës 2 të këtij udhëzimi, duke informuar me shkrim për çdo projekt, që do të financohet.

11. Komisioni, me marrjen e informacionit nga Drejtoria e Politikave të Shërbimeve Sociale përcakton vlerën përfundimtare të financimit.

12. Komisioni për përcaktimin e financimit të mirëmbajtjes së ambienteve të qendrave të përkujdesit social do të marrë në konsideratë edhe orientimet e Avokatit të Popullit, si dhe sugjerimet e subjekteve jopublike, të specializuara në këto shërbime.

13. Fondi i miratuar nga Komisioni për mbështetje, sipas germave “d” të pikës 1 të këtij udhëzimi, delegohet si transfertë e kushtëzuar në njësitë e qeverisjes vendore nga MPÇSSHB, së bashku me një kopje të vendimit të Komisionit.

14. Njësitë e qeverisjes vendore nuk kanë të drejtë të ndryshojnë destinacionin e përdorimit të këtij fondi.

15. Njësitë e qeverisjes vendore janë përgjegjëse për menaxhimin e këtyre fondeve, sipas legjislacionit në fuqi.

16. Këshilli i njësisë së qeverisjes vendore merr vendim për përdorimin e këtij fondi, për qëllimin që është dhënë, së bashku me kontributin e saj.

17. Për raportimin e realizimit të përdorimit të fondit, si dhe kontrollin e përdorimit të tyre të ndiqet e njëjta procedurë si veprohet për fondet buxhetore në zbatim të ligjit nr. 9936, datë 26.6.2008 “Për menaxhimin e sistemit buxhetor në Republikën e Shqipërisë”, ligjit nr. 10 296, datë 8.7.2010 “Për menaxhimin financiar dhe kontrollin”, ligjit nr. 10 487, datë 5.12.2011 “Për buxhetin e vitit 2012”, udhëzimit të Ministrit të Financave nr. 2, datë 6.2.2012 “Për procedurat standarde të zbatimit të buxhetit”, si dhe udhëzimit të Ministrit të Financave nr. 2/1, datë 15. 2.2011 “Për zbatimin e buxhetit të vitit 2012”.

Ky udhëzim hyn në fuqi pas botimit në Fletoren Zyrtare.

MINISTRI I PUNËS, ÇËSHTJEVE SOCIALE
DHE SHANSEVE TË BARABARTA
Spiro Ksera